

# HAIKU ŽEMAITĒŠKĀ

SILVĒJĒ UDA (Šiaulē)



*Haiku – pruožēnē poezējē, gēmusi Japuonijuo XIX omžiuo. Haiku klasēkēnē forma: 3 eilotēs, katrūs skēiminīs pasiskērstē 5+7+5. Kūriniūs užfiksoujems muomēnta gruožis, dvasēnē būsena, spalvas, garsā, vaizdā.*

\*\*\*

Smarkē lašā jau  
moš palaša akmēnis.  
Prakiorst varvieklis.

\*\*\*

Trinkteliejē vasara.  
Galvelē sokas smarkē  
nu šēina kvapa.

\*\*\*

Kamēnū dūmās  
numū gīvībēs raituos.  
Pavakarē mets.

\*\*\*

Leidas saulelē.  
Bliūda vundinie matuos  
morzēnas kuojēs.

\*\*\*

Rodou parējē.  
Vuobolā senam' suodnē  
i širdie daužuos.

\*\*\*

Dolkēnam' longē  
paskotēnē meluodēj  
mosēs grajēj.

\*\*\*

Unt senū trepu  
katēn žalem' bliūdalie  
mēnolē morza.

\*\*\*

Kombainā užē.  
Vasaras romantika  
be šērdēis kūlē.

\*\*\*

Ne žalē žiuogā  
sučērpēn šērdēis stiguom.  
Žuodē pri opēs.

\*\*\*

Buobu vasara.  
Unt smēlgu aukštū buokštu  
vuorā pasikuorē.

\*\*\*

Tuolēma žēima  
puotuograpijuo senuo  
dēdelē šēlda.

\*\*\*

Loubas kaimalie,  
kor opē prasided,  
aš prasidiejau.

\*\*\*

Dobēlū laukūs  
nusiūdsava vakars  
ligi užtema.

\*\*\*

Ēlguo keliuonie  
vēinakis pruožektuorios  
nakti pjaustinie.

\*\*\*

Pu aukštuom pušim  
tarp gondra ēlgū kuoju  
vaikistē sopas.

\*\*\*

Kūtēs šēlēma  
plūst pru atvēras duris.  
Ē viel suoduo briekšt.

\*\*\*

Laukē pūgavuo.  
Unt pakuruoms garās vērst  
snēiga lēkotē.

\*\*\*

Šuokčiuo kiaušēlē  
karštū dažū vuonēlie.  
Rītuo Velīkas.

\*\*\*

Drūtē oužoulā  
pri Apoulēs ē Skouda  
tvērtuovē sauga.

\*\*\*

Arklinis vēžēms  
partratēn sausus šēinus.  
Pradiējē krapīt.

\*\*\*

Keturims klevams  
kortuom sužaistē paded  
viejē rugsiejē.

\*\*\*

Bolbēinuojēs kvep.  
Vedom nuovargis dilgčiuo  
muolēnuos' kuojuos'.

\*\*\*

Vuobuliū sunka  
laš nu vērtovēs stala.  
Suodnu gīvībē.

\*\*\*

Krūmus išpoušē  
ašuokliu auskarā ēlgē.  
Macni rūgštelē.

\*\*\*

Tarp krapu, muorku  
kanapēs sargiba ein.  
Aukštē kareivē.

\*\*\*

Jautiu ganikluo  
rauduona koskelē švēit.  
Drūsi ta madam.

\*\*\*

Droskēnē sena  
liūd ont staktuos žaliuos.  
Toštē vakarā.

\*\*\*

Sunkē mēiguotē  
tās lēipas vēdornaktēs.  
Slivas kritinie.

\*\*\*

Javā išplaukē.  
Ne varpas lingounās, nē –  
dounelēs jūra.

\*\*\*

Pasiov mergelē  
so taškelēs jopēlē.  
Rītuo atlaidā.

\*\*\*

Daržūs važinie  
sauliegrāžu tekēnē.  
Lītaus nebēbūs.

\*\*\*

Natas išmietius'  
audra grajēj meluodēj  
elektras laidās.

\*\*\*

Vēdorvasaris.  
Laukūs vielek snīguriou  
bulviu židiejēms.

\*\*\*

Pri Švēntuos Vuonuos  
švēisi galvelē glaudās,  
maluonēs pēlna.

\*\*\*

Stuoj šaltas naktis.  
Viel žvaigždie viedra dognē  
sustinga i leda.

\*\*\*

Vasara bēngās.  
Neramē numū longē  
drugielis trunkuos.

\*\*\*

Rausvos lēžiuvīs  
brauk per baltas pēin potas.  
Meili vagīstē.

\*\*\*

Griežtā rakts sutrat  
senuos varpēnēs spīnuo.  
Zvanīsem mišiuom.

\*\*\*

Lēngvā prisnēga  
unt ceretas glielietas  
kvēitiniu mēltu.

\*\*\*

Numinis alos  
linksmā besisukiuodams  
trēnk' i pakauši.

\*\*\*

Tēkros lapkritis.  
Baladuojēs palungiem  
šaltiausē litā.

\*\*\*

Vēsa bažnīcē  
per pērma Komunējē  
baltoun angelās.

\*\*\*

Ruošamies žēimā.  
Medius gliebēs nešam i  
malkēnēs pēlva.

\*\*\*

Koisiaus meluodējē  
vēsa nakti mon nervās  
siekmīngā grajēj.

\*\*\*

Kaspēnā baltē  
drogelēs dom skraidžiuo  
dukruos kaselies.

\*\*\*

Triukšmos suodnalie.  
Naujajem' inkēlē šuok  
špuokā veselē.

\*\*\*

Dēdiuojē pelkie  
puopierēnem' laivīnē  
vākū svajuonēs.

\*\*\*

Tik trumpa laimē  
naktēnems drogeliokams  
švēisomē žvakēs.

\*\*\*

Sužīdiejē lazda  
muotēnas kēimē senam'.  
Užuomarša vāks.

\*\*\*

Pēivu žīdiejēm  
pasemk pēlna krūzieli  
šērdēi pagirdīt.

\*\*\*

Buoruželēs dvē  
nu vāka pēršta nuliek',  
vo taškelē lēk.

\*\*\*

Pru katēla dungti  
potas šnīpšdamas drimb.  
Linksma ognelē.

\*\*\*

Slīvas šakelē  
pru lungus smalsē žvalguos.  
Žīdiejēma mets.

\*\*\*

Jaunam' beržīnē  
gegotē užkokava.  
Būs ēlgs gīvenēms.

\*\*\*

Tēisē i dūšē  
mon veiz nemirksiedama  
šolēnēis akēs.

\*\*\*

Kaima stuotēlie  
viejē užrašus skaita  
iš senū plītu.

\*\*\*

Nebžēna, kuo laukt'  
sutrūniejēs soulielis  
pri sena kapa.



Baranauskienė Silvėjė-Silvėjė Uda. Puotuograpė Norvilienė Ligita

\*\*\*

Ežer vundini  
gabalelēs sutropēn  
smarkiausis litos.

\*\*\*

Dvē žmuogaus ronkas  
iš minkšta muolē gabal  
Pondēiva sutvier'.

\*\*\*

Pēiniu patalūs'  
atsargē kvēpoudama  
vakara klausaus.

\*\*\*

Stiklieniem kuojuom  
linksmā akmēnim šuokčiuo  
opelē vondou.

\*\*\*

Už kvapnēs dēinas  
žemougiu karuolēs  
vasar išpoušiau.

\*\*\*

Dailos vaikielis  
kumpuotē saldēs višnēs  
so šaukšto žvejuo.

\*\*\*

Jaunuo šeimīnuo  
mamas sijuon padelkas  
vākā nusagstē.

\*\*\*

Do auksa žēidā  
unkstība pavasari  
vedom pražīda.

\*\*\*

Vasara prisērp.  
Aukštas, lēiknas višnelēs  
viel špuokus viliuo.

\*\*\*

Rītmētē gēsmiū  
patēs jautriausēs gaidas  
ašaras užsmaugē.

(Atkelta iš 17 p.)

\*\*\*

Šventiu įkarštie  
nu smarkiū dainū liekšties'  
šaltiena sudreb.

\*\*\*

Ėlguom druobīnuom  
dėdlė elegantėškā  
naktės nusileid.

\*\*\*

Kėkvėins žmuogielis  
sava givėnėm kūli  
i kalna rėtėn.

\*\*\*

Grīžau traukėnio.  
Bet išlėpės nebtorio,  
pas kū parėtė.

\*\*\*

Longa atdariau.  
Lėipsnelė sava snapė  
pavasari' parneš'.

\*\*\*

Lauko naujīnu.  
Viel baimė šaltās pėrstās  
nogar čiupinie.

\*\*\*

Pradedo suprast',  
ka laimės jokiuos' formulies'  
neišein surast'.

\*\*\*

Per vėsus lungus  
kvėito vasaras viejus.  
Užuolaidas šuok.

\*\*\*

Do mažė žvėrblē  
unt apvalė stalelė  
pīrag kaštavuo\*.

\*\*\*

Muokaus eš vėštas:  
padedo kiaušieli ē  
šauko pasauliου.

\*\*\*

Pasiotė vākā  
iš veidruodieliu paleid  
saulės zoikelius.

# EILIERAŠTĖ

LAURA LU (Telšė)



## Paveikslelė

Kāp kartās sunkė būn  
ėš omžiaus mažėlelės  
plauk riškė paveikslelė  
aukštuos žuolies pėivas  
braida karvės dėdelės  
buoželė tripčiuo  
ėš truobuos ē tvartūs  
par kiauras vasaras  
ba pabėnguos  
ėlgiausė daržā  
suodnā rodėnėis  
prėkrėtė vobuolū  
kāp kartās sunkė būn  
ėšsėjemo tus paveikslelius  
prėspaudo prė šėrdėis  
ėr pārzegnuojo

2019 m. gegužės 9 d.

## Kāp saulė ešlend

Kāp saulė ešlend  
ėš ukulė  
tėp gerā palėikt  
koten atruoda pašalius  
pašėrdžius  
vėsė žmuonės  
nosėmetė škorlius  
žėimėnius  
plasnuo

atruoda kāp paukštelė  
kas spsrno pakėrpto  
kas ešdėdė  
vėsā kėtuoks givėnėms  
kāp saulė pašvėit  
ėš ukulė

2019 m. gegužės 9 d.

## Prėkeltė

Kāp vasara  
apsok kramė  
lek čiūčelas laukās  
ėr klėpatas vėsi  
ėš mėrosiu prėkeltė  
nieka nebveiz  
tėk skob  
vėins kėta notvertė  
kāp vasara  
apsok krāmė  
ėr žlėbakės  
vėsi palėikt  
sviets tėp atsėgaun  
no naujū pariedku  
ė tojaus ešsėpot varlės

2019 m. lėipas 15 d.

## Žemaitėjė

Ėš tavės prasėdiejau  
ė tavėm nosėbėngso  
ėš tavės kalba –  
kūlės skombėn:  
ė, ėi, ou  
ėš tavės mėškā  
pelkės vondėnīs  
ė pajauta givastėis  
kap nosėdorniaivos svetor  
apėntās trauk mon šėrdi  
ėš tavės prasėdiejos  
ė tavėm nosėbėngtė

2019 m. lėipas 17 d.



Jonikė Laura -Laura Lu.  
Puotuograpė Gurevičiūtė-Gailė  
Gintarė

## Tėp tikė ėn pavasaris

Tėp tikė ėn pavasaris  
čiut kuojės vėlkdams  
tėp šikštė šviščiου saulė  
kavuodam gėlsvas bėzas

tėp bokštė po bėškieli  
atkalnies blėndės kreikās  
tėp strainė lėnkies aptās  
konvalijas ešsėskleid

tėp drioužiem zorz opalė  
ė rinki nuklaksiejė  
tėp zgrebnė smaigstuos  
blezdingas  
ont čiokorū paluociu

tėp tonkė dūšė maliavuo  
apgerbtė apvažė  
tėp baltgalviem nobėrziuotė  
pavasarė ėr monėm

2021 m. gegužės 5 d.